



An Bhruiséil, 21 Samhain 2018
(OR. en)

13876/18

**Comhad Idirinstitiúideach:
2018/0112(COD)**

MI 794
COMPET 735
DIGIT 216
IND 323
TELECOM 379
PI 153
AUDIO 92
JUSTCIV 263
CODEC 1887

NÓTA

ó:	Coiste na mBuanionadaithe (Cuid 1)
chuig:	An Chomhairle
Uimh. an doic. ón gCoim.:	8413/18 + ADD 1
Ábhar:	Togra le haghaidh Rialachán ó Pharlaimint na hEorpa agus ón gComhairle maidir le cothroime agus trédhearcacht a chur chun cinn d'úsáideoirí gnó a bhaineann úsáid as seirbhísí idirmheánaithe ar líne - Cur chuige ginearálta

I. RÉAMHRÁ

1. Ar an 26 Aibreán 2018, chuir an Coimisiún an togra thuasluaite le haghaidh Rialacháin faoi bhráid Pharlaimint na hEorpa agus na Comhairle.¹ Tá an togra seo bunaithe ar Airteagal 114 den Chonradh ar Fheidhmiú an Aontais Eorpaigh (CFAE).

¹ 8413/18 + ADD1.

2. Is é cuspóir an Rialacháin seo rannchuidiú le feidhmiú cuí an mhargaidh inmheánaigh trí rialacha a leagan síos lena áirithiú go gcuirtear trédhearcacht iomchuí agus deiseanna éifeachtacha sásaimh ar fáil d'úsáideoirí gnó a bhaineann leas as seirbhísí idirmheánaithe ar líne agus d'úsáideoirí suíomhanna gréasáin corparáideacha i dtaca le hinnill chuardaigh ar líne.
3. Thug Coiste Eacnamaíoch agus Sóisialta na hEorpa a thuairim maidir leis an togra ar an 19 Meán Fómhair 2018.²
4. Níor chaith an Coiste um an Margadh Inmheánach agus um Chosaint an Tomhaltóra (IMCO) de chuid Pharlaimint na hEorpa vóta ar a thuarascáil go fóill.

II. AN STAID MAR ATÁ

5. Chuir an Mheitheal um Iomaíochas agus Fás tús le scrúdú ar an togra ar an 4 Bealtaine 2018. San aon chruinniú dhéag fhoirmiúla a bhí ar siúl le linn Uachtaránacht na Bulgáire agus Uachtaránacht na hOstaire, díriodh an plé sa Mheitheal go príomha ar raon feidhme an Rialacháin, ar mhíreanna maidir le fionraí agus foirceannadh, ar rangú na dtorthaí, ar imeachtaí in ábhair choiriúla mar chuid de na féidearthachtaí sásaimh a d'fhéadfadh a bheith ann, agus ar fhorfheidhmiú an Rialacháin féin.
6. Le linn an dá chruinniú a bhí ag an Meitheal ar an 23 Bealtaine agus ar an 11 Meitheamh 2018, rinneadh mionscrúdú ar an measúnú tionchair a ghabhann leis an togra seo. Léiríodh leis an scrúdú sin go raibh na toscaireachtaí i bhfách, don chuid is mó, le haidhm an togra, leis na modhanna, leis na critéir agus leis na roghanna a shaináithin an Coimisiún.
7. Ag an gcruinniú a bhí ag Coiste na mBuanionadaithe (COREPER) ar an 16 Samhain 2018, rinneadh plé ar an téacs comhréitigh ón Uachtaránacht (13875/1/18 REV 1) agus thoiligh sé go gcuirfí an téacs san Iarscríbhinn a ghabhann leis seo chuig Comhairle Iomaíochais an 29 Samhain 2018 d'fhonn teacht ar chomhaontú maidir le cur chuige ginearálta.

² TEN/662-EESC-2018.

III. CONCLÚID

8. Iarrtar ar an gComhairle (Iomaíochas) a chomhaontú maidir leis an téacs (cur chuige ginearálta) a mharcáil agus sainordú a thabhairt don Uachtaránacht dul i mbun caibidlíochta le hionadaithe Pharlaimint na hEorpa agus an Choimisiúin Eorpaigh maidir leis an gcomhad seo.
-

Togra le haghaidh

RIALACHÁN Ó PHARLAIMINT NA hEORPA AGUS ÓN gCOMHAIRLE

maidir le cothroime a chur chun cinn trí bhíthin [...] trédhearcachta d'úsáideoirí gnó a bhaineann úsáid as seirbhísí idirmheánaithe ar líne agus d'úsáideoirí suíomhanna gréasáin corparáideacha i dtaca le hinnill chuardaigh ar líne

(Téacs atá ábhartha maidir le LEE)

TÁ PARLAIMINT NA hEORPA AGUS COMHAIRLE AN AONTAIS EORPAIGH,
Ag féachaint don Chonradh ar Fheidhmiú an Aontais Eorpaigh, agus go háirithe Airteagal 114 de,
Ag féachaint don togra ón gCoimisiún Eorpach,
Tar éis dóibh an dréachtghníomh reachtach a chur chuig na parlaimintí náisiúnta,
Ag féachaint don tuairim ó Choiste Eacnamaíoch agus Sóisialta na hEorpa³,
Ag féachaint don tuairim ó Choiste na Réigiún⁴,
Ag gníomhú dóibh i gcomhréir leis an ngnáthnós imeachta reachtach,

³ IO C , , lch. .

⁴ IO C , , lch. .

De bharr an méid seo a leanas:

- (1) Is áis fhíorthábhachtach don fhiontraíocht, don trádáil agus don nuálaíocht iad na seirbhísí idirmheánaithe ar líne, is féidir leo feabhas a chur ar leas tomhaltóirí agus tá méadú ag teacht ar an úsáid a bhaineann an earnáil phríobháideach agus an earnáil phoiblí astu. Cuireann siad rochtain ar fáil ar mhargaí nua agus ar dheiseanna tráchtála nua, rud a chuireann ar a gcumas do ghnóthais leas a bhaint as tairbhí an mhargaidh aonair. Thairis sin, cuireann siad ar a gcumas do thomhaltóirí san Aontas leas a bhaint as na tairbhí sin, go háirithe tríd an rogha earraí agus seirbhísí a thairgtear ar líne a mhéadú.
- (2) Maidir leis na gnóthais a úsáideann seirbhísí idirmheánaithe ar líne chun teagmháil a dhéanamh le tomhaltóirí, is féidir leis na seirbhísí sin a bheith ríthábhachtach ó thaobh a rathúnais tráchtála de. **Chun go mbeifear in ann leas iomlán a bhaint as an ngeilleagar ardán, is den tábhacht mar sin go mbeadh iontaoibh ag gnóthais as ardáin a mbeidh caidreamh tráchtála acu leo. Tá ríthábhacht leis seo, thar aon rud eile de thoradh** an mhéadaithe ar an líon idirbheart idirmheánaithe arna ndéanamh trí bhíthin seirbhísí idirmheánaithe ar líne, ar éifeachtaí láidre indíreacha gréasáin sonraíbhunaithe is cúis leis, tá méadú ag teacht ar spleáchas na n-úsáideoirí gnó sin, go háirithe micrifhiontair, fiontair bheaga agus mheánmhéide, ar na seirbhísí sin chun tomhaltóirí a shroicheadh. I bhfianaise an mhéadaithe sin ar spleáchas, is minic a bhíonn cumhacht mhargála níos mó ag soláthraithe na seirbhísí sin, rud a fhágann go mbíonn siad in ann, go bunúsach, gníomhú go haontaobhach ar bhealach a d'fhéadfadh bheith éagórach agus a d'fhéadfadh díobháil a dhéanamh do leasanna dlisteanacha a n-úsáideoirí gnó agus, go hindíreach, do leasanna tomhaltóirí san Aontas chomh maith.

- (3) Ar an gcaoi chéanna, is féidir innill chuardaigh ar líne bheith ina bhfoinsí tábhachtacha tráchtá idirlín do ghnóthais a thairgeann earraí agus seirbhísí do thomhaltóirí ar líne trí shuíomhanna gréasáin agus dá bhrí sin is féidir leo difear mór a dhéanamh do rathúnas tráchtála na n-úsáideoirí suíomhanna gréasáin corparáideacha a thairgeann a n-earraí agus a seirbhísí ar líne ar an margadh inmheánach. I ndáil leis sin, imríonn an rangú a dhéanann soláthraithe innill chuardaigh ar líne, lena n-áirítear na suíomhanna gréasáin sin trína dtairgeann úsáideoirí suíomhanna gréasáin corparáideacha a n-earraí agus a seirbhísí do thomhaltóirí, imríonn sin tionchar mór ar rogha tomhaltóirí agus ar rathúnas tráchtála na n-úsáideoirí suíomhanna gréasáin corparáideacha sin. Toisc nach mbíonn aon ghaol conarthach acu leis na húsáideoirí suíomhanna gréasáin corparáideacha, bíonn soláthraithe innill chuardaigh ar líne in ann, go bunúsach, gníomhú go haontaobhach ar bhealach a d'fhéadfadh bheith éagórach agus a d'fhéadfadh díobháil a dhéanamh do leasanna dlisteanacha úsáideoirí suíomhanna gréasáin corparáideacha agus, go hindíreach, do leasanna tomhaltóirí san Aontas chomh maith.
- (4) Mar thoradh ar an spleáchas atá ag úsáideoirí gnó ar sheirbhísí idirmheánaithe ar líne is minic nach mbíonn ach deis theoranta ag úsáideoirí gnó sásamh a lorg i gcásanna ina bhfuil díospóid ann de dheasca gníomhaíochtaí aontaobhacha na soláthraithe a chuireann na seirbhísí sin ar fáil. Is minic nach gcuireann na soláthraithe sin córais inmheánacha éifeachtacha inrochtana ar fáil chun déileáil le gearáin. Is féidir sásraí réitithe díospóide bheith neamhéifeachtach freisin ar chúiseanna éagsúla, lena n-áirítear easpa idirghabhálaithe speisialaithe agus an eagla a bhíonn ar úsáideoirí gnó roimh dhíoltas.

- (5) Ó nádúr, baineann poitéinseal trasteorann le seirbhísí idirmheánaithe ar líne agus le hinnill chuardaigh ar líne, agus leis na hidirbhearta [...] a éascaíonn siad, agus baineann tábhacht ar leith leo maidir le feidhmiú iomchuí mhargadh aonair an Aontais sa gheilleagar atá ann faoi láthair. Mar gheall ar na cleachtais trádála atá ag soláthraithe áirithe a chuireann na seirbhísí sin ar fáil, cleachtais a d'fhéadfadh a bheith míchothrom agus díobhálach, agus **de cheal sásraí éifeachtacha cúitimh**, cuirtear bac ar leas iomlán a bhaint as an bpoitéinseal sin agus imrítear tionchar diúltach ar fheidhmiú iomchuí an mhargaidh aonair. [...]
- (5a) Ba cheart [...] tacar rialacha éigeantacha aonfhoirmeacha spriocdhírithe **i dtaca le trédhearcacht** [...] a bhunú ar leibhéal an Aontais chun timpeallacht ghnó ar líne atá cóir intuartha inbhuanaithe iontaofa a áirithiú laistigh den mhargadh inmheánach [...]. **D'fhonn an gnó trasteorann laistigh den Aontas a éascú agus, ar an gcaoi sin, feidhmiú cuí an mhargaidh inmheánaigh a fheabhsú agus dul i ngleic leis an ilroinnt a d'fhéadfadh a theacht i réimsí sonracha a chumhdaítear le forálacha an Rialacháin seo**[...], **ba cheart trédhearcacht iomchuí a bheith ann, mar aon le deiseanna éifeachtacha chun sásamh a fháil ar fud an Aontais, go háirithe d'úsáideoirí gnó a bhaineann úsáid as seirbhísí idirmheánaithe** [...]. **Agus cur chuige céim ar chéim i bhfeidhm, ba cheart don Choimisiún feidhmiú na rialacha sin a mheas, lena n-áirítear cé acu atá nó nach bhfuil gá le tuilleadh rialála, laistigh den phróiseas athbhreithnithe dá bhforáiltear sa Rialachán seo.**

- (6) Ba cheart foráil a dhéanamh leis na rialacha sin maidir le trédhearcacht iomchuí i dtaca le húsáideoirí suíomhanna gréasáin corparáideacha a rangú sna torthaí cuardaigh a ghintear le hinnill chuardaigh ar líne. Mar sin féin, ag an **am** céanna, ba cheart cosaint a thabhairt sna rialacha sin don phoitéinseal tábhachtach nuálaíochta atá sa gheilleagar ardáin ar líne i gcoitinne. **Is iomchuí a shoiléiriú nár cheart go n-imreodh an Rialachán seo tionchar ar dhlí sibhialta náisiúnta, go háirithe dlí na gconarthaí, amhail na rialacha maidir le bailíocht, déanamh, éifeachtaí nó foirceannadh conartha sa mhéid go bhfuil na rialacha ar dhlí sibhialta náisiúnta i gcomhréir le dlí an Aontais agus a mhéid nach gcumhdaítear na gnéithe ábhartha le forálacha an Rialacháin seo. De bhreis air sin, ba cheart saoirse a bheith ag na Ballstáit go fóill dlíthe náisiúnta a chuireann toirmeasc nó beart sriantach ar iompar aontaobhach nó ar chleachtais tráchtála éagóracha a chur i bhfeidhm.**

- (7) Ós rud é gur gnách gné dhomhanda a bheith ag seirbhísí idirmheánaithe agus ag innill chuardaigh ar líne, ba cheart feidhm a bheith ag an Rialachán seo maidir le soláthraithe na seirbhísí sin, is cuma cé acu i mBallstát nó lasmuigh den Aontas atá siad bunaithe ar choinníoll go gcomhlíonfar dhá choinníoll charnacha. Ar an gcéad dul síos ba cheart na húsáideoirí gnó nó na húsáideoirí suíomhanna gréasáin eile a bheith bunaithe san Aontas. Ar an dara dul síos, ba cheart do na húsáideoirí gnó nó do na húsáideoirí suíomhanna gréasáin corparáideacha, trí na seirbhísí sin a chur ar fáil, a seirbhísí agus a n-earraí a thairiscint do thomhaltóirí atá san Aontas i dtaca le cuid den idirbheart ar a laghad. Ba cheart na tomhaltóirí sin a bheith san Aontas ach ní gá dóibh a n-áit chónaithe a bheith san Aontas nó a náisiúntacht a bheith in aon Bhallstát. Dá réir sin, ní bheidh feidhm ag an Rialachán seo i gcás nach bhfuil na húsáideoirí gnó nó na húsáideoirí suíomhanna gréasáin corparáideacha bunaithe san Aontas nó i gcás ina bhfuil siad bunaithe san Aontas ach ina n-úsáideann siad seirbhísí idirmheánaithe ar líne nó innill chuardaigh ar líne chun earraí nó seirbhísí a thairiscint do thomhaltóirí atá lasmuigh den Aontas nó do dhaoine nach tomhaltóirí iad. **Ina theannta sin, ba cheart feidhm a bheidh ag an Rialachán seo gan beann ar pé dlí ab infheidhme maidir le conradh.**
- (8) Déanann soláthraithe a oibríonn seirbhísí iltaobhacha atá bunaithe i bhfírinne ar an tsamhail ghnó um thógáil éiceachórais idirmheánú ar éagsúlacht mhór caidrimh tráchtála idir gnólachtaí agus tomhaltóirí. Chun na seirbhísí ábhartha a chuimsiú, ba cheart seirbhísí idirmheánaithe ar líne a shainmhíniú go cruinn agus ar bhealach atá neodrach ó thaobh na teicneolaíochta de. Go háirithe, ba cheart nach mbeadh sna seirbhísí sin seirbhísí de chuid na sochaí faisnéise, a bhfuil sé de shaintréith acu gurb é is aidhm leo tionscnamh idirbheart díreach idir úsáideoirí gnó agus tomhaltóirí a éascú, beag beann ar cé acu a thugtar na hidirbhearta chun críche ar deireadh ar líne, ar thairseach ar líne sholáthraí na seirbhísí idirmheánaithe ar líne atá i gceist, nó ar thairseach an úsáideora gnó, [...] as líne **nó go deimhin nach dtugtar chun críche in aon chor iad.** Ina theannta sin, ba cheart na seirbhísí a sholáthar ar bhonn gaolta conarthacha idir na soláthraithe agus na húsáideoirí gnó **a thairgeann earraí nó seirbhísí do thomhaltóirí** [...]. Ba cheart a mheas gurb ann do ghaol conarthach den chineál sin i gcás ina gcuirfidh an dá pháirtí in iúl go neamhbhalbh [...] agus **ar mheán marthanach** go bhfuil fúthu a bheith faoi cheangal, gan an gá comhaontú sainráite i scríbhinn a bheith ann.

- (9) Dá bharr sin, ar na samplaí de na seirbhísí idirmheánaithe ar líne a chumhdaítear leis an Rialachán seo tá margaí ríomhthráchtála ar líne, lena n-áirítear margaí comhoibríocha ar a mbíonn úsáideoirí gnó gníomhach, seirbhísí um bogearraí feidhmchláir ar líne, amhail siopaí ar líne ina ndíoltar feidhmchláir bogearraí, agus seirbhísí meán sóisialta ar líne, **beag beann ar an teicneolaíocht a úsáidtear chun na seirbhísí sin a chur ar fáil. Ar an gcuma sin, is féidir seirbhísí idirmheánaithe ar líne a chur ar fáil le teicneolaíocht ghlórchúntóra. Anuas air sin, níor cheart go dtiocfadh sé i gceist cé acu atá nó nach bhfuil íocaíocht airgeadaíochta i gceist leis na hidirbhearta sin nó go gcuirtear cuid den idirbheart i gcrích ar líne.** Mar sin féin, níor cheart feidhm a bheith ag an Rialachán seo maidir le **seirbhísí idirmheánaithe ar líne idir piaraí gan úsáideoirí gnó a bheith i láthair, ná le seirbhísí idirmheánaithe ar líne idir fhíor-ghnólachtaí nach ndéantar a thairiscint do thomhaltóirí,** maidir le huirlisí seirbhíse fógraíochta ar líne [...] **agus** maidir le malartáin fógraíochta ar líne nach gcuirtear ar fáil chun é a dhéanamh níos éasca idirbhearta díreacha a thionscnamh agus nach mbaineann gaol conarthach le tomhaltóirí leo. **Ar an gcúis chéanna, ní chumhdaítear sa Rialachán seo seirbhísí bogearraí maidir le hoptamú inneall cuardaigh ná seirbhísí bogearraí maidir le cosc fógraíochta. Ina theannta sin, ní chumhdaítear seirbhísí idirmheánaithe ar líne maidir leis an teicneolaíocht a nascann crua-earraí, agus feidhmchláir sa Rialachán seo, ar an ábhar nach bhfuil siad bainteach go díreach le soláthar earraí ná seirbhísí.** Níor cheart feidhm a bheith ag an Rialachán seo maidir le seirbhísí íocaíochta ar líne toisc nach gcomhlíonann na seirbhísí sin iad féin na ceanglais is infheidhme ach gur seirbhísí cúnta iad go bunúsach i ndáil le soláthar earraí agus seirbhísí do na tomhaltóirí i gceist.
- (10) I gcomhréir le cásdlí ábhartha Chúirt Bhreithiúnais an Aontais Eorpaigh agus ós rud é gur léir gur staid spleách í staid na n-úsáideoirí gnó go háirithe i ndáil le seirbhísí idirmheánaithe ar líne a fheidhmíonn mar thairseach do thomhaltóirí i bhfoirm daoine nádúrtha, ní mór a thuiscint gur ag tagairt do dhaoine nádúrtha, i gcás ina bhfeidhmíonn siad chun críocha atá lasmuigh dá dtrádáil, dá ngnó, dá gceird nó dá ngairm, atá an coincheap de thomhaltóir a úsáidtear chun raon feidhme an Rialacháin seo a leagan amach.

- (11) Ar chúiseanna comhleanúnachais, ba cheart an sainmhíniú ar inneall cuardaigh ar líne a ailíniú leis an sainmhíniú a úsáidtear i dTreoir (AE) 2016/1148 ó Pharlaimint an hEorpa agus ón gComhairle⁵.
- (12) D'fhonn úsáideoirí gnó a chosaint go héifeachtach i gcás inar gá, ba cheart feidhm a bheith ag an Rialachán seo i gcás ina ndéanann [...] **soláthraí seirbhísí idirmheánaithe ar líne** téarmaí agus coinníollacha gaoil chonarthaigh [...] **a chinneadh go leithleach** [...], gan beann ar a n-ainm ná ar a bhfoirm. Is ar bhonn measúnú foriomlán ba cheart a **mheas** [...] cé acu a rinneadh nó nach ndearnadh téarmaí agus coinníollacha **a chinneadh [...] go leithleach**, agus ní toisc chinntitheach ann féin é go ndearnadh forálacha áirithe díobh a chaibidil go leithleach.
- (13) Lena áirithiú go gcuirfidh téarmaí agus coinníollacha ginearálta gaoil chonarthaigh ar a gcumas d'úsáideoirí gnó na coinníollacha tráchtála ar úsáid, ar fhoirceannadh agus ar fhionraíocht seirbhísí idirmheánaithe ar líne a dhéanamh amach, agus le hintuathacht maidir lena gcaidreamh gnó a bhaint amach, ba cheart na téarmaí agus na coinníollacha sin a dhréachtú i [...] bhfoclaíocht atá **soiléir sothuigthe** [...]. Níor cheart a mheas gur dréachtaíodh téarmaí agus coinníollacha i [...] gcaint atá **soiléir sothuigthe** i gcás ina bhfuil siad doiléir, neamhshonrach nó nach bhfuil siad mionsonraithe go leor maidir le saincheistanna tráchtála agus ar an gcaoi sin nach dtugann siad leibhéal réasúnach intuathachta d'úsáideoirí gnó maidir leis na gnéithe is tábhachtaí den ghaol conarthach.

⁵ Treoir (AE) 2016/1148 ó Pharlaimint na hEorpa agus ón gComhairle maidir le bearta le haghaidh leibhéal ard coiteann slándála líonra agus córas faisnéise ar fud an Aontais (IO L 194, 19.7.2016, lch. 1).

- (14) Féadann trédhearcacht na dtéarmaí agus na gcoinníollach ginearálta bheith ríthábhachtach maidir le gaolta gnó inbhuanaithe a chur chun cinn agus iompar éagóir díobhálach d'úsáideoirí gnó a chosc. Dá bharr sin ba cheart do sholáthraithe seirbhísí idirmheánaithe ar líne a áirithiú go mbeadh na téarmaí agus na coinníollacha ar fáil go héasca ar feadh chéimeanna iomlána an ghaoil chonarthaigh, lena n-áirítear úsáideoirí gnó ionchasacha ag an gcéim réamhchonarthaigh, agus go gcuirfí aon mhodhnuithe ar na téarmaí sin in iúl **ar mheán marthanach** d'úsáideoirí faoi cheann tréimhse fógra shocraithe atá réasúnach agus comhréireach i bhfianaise na n-imthosca sonracha agus ar tréimhse cúig lá dhéag ar a laghad í. Níor cheart feidhm ag an tréimhse fógra sin i gcás ina ndéanfaidh an t-úsáideoir gnó lena mbaineann é a tharscaoileadh ar bhealach nach bhfuil débhríoch nó i gcás ina dtiocfaidh ann don ghá an modhnú a chur chun feidhme gan an tréimhse fógra a urramú de thoradh oibleagáid dhlíthiúil atá ar an soláthraí seirbhísí faoi dhlí an Aontais nó faoin dlí náisiúnta, agus a mhéid is ann don ghá dá thoradh sin. **Mar sin féin, níor cheart go dtiocfadh athruithe eagarthóireachta a mholtar faoin téarma "modhnú" a mhéid agus nach gcuireann siad aon athrú ar inneachar ná ar shainmhíniú na dtéarmaí agus na gcoinníollach. Maidir leis an gceanglas a bhaineann le modhnuithe a mholtar a chur in iúl ar mheán marthanach, amhail r-phoist nó córais chumarsáide eile, a cheadaíonn, *inter alia*, glacadh nó stóráil aon chineál teachtaireachta, ba cheart go bhféadfadh na húsáideoirí gnó athbhreithniú éifeachtach a dhéanamh ar na modhnuithe sin ag tráth níos déanaí.**

- (15) Chun úsáideoirí gnó a chosaint, **níor cheart go mbeadh** téarmaí agus coinníollacha neamhchomhlíontacha ceangailteach ar an úsáideoir gnó lena mbaineann, agus éifeachtaí *ex tunc* i gceist. [...] Níor cheart go mbainfeadh sé **sin** ach le forálacha sonracha na dtéarmaí agus na gcoinníollach nach bhfuil comhlíontach. Ba cheart de na forálacha eile leanúint de bheith bailí agus in-fhorfheidhmithe sa mhéid **go bhfuil siad bailí agus in-fhorfheidhmithe faoin dlí náisiúnta** agus gur féidir iad a scaradh ó na forálacha neamhchomhlíontacha. Is iomchuí a shoiléiriú nár cheart do sholáthraí seirbhísí idirmheánaithe ar líne a bheith ag brath ar théarmaí ná ar choinníollacha neamhchomhlíontacha ná ar a bhforálacha sin, ná ag baint aon éileamh astu. **Níor cheart go ndéanfaí difear d'aon athbhreithniú eile ar inneachar na dtéarmaí agus na gcoinníollach faoin dlí náisiúnta.**

- (16) Féadfaidh cúiseanna dlisteanacha a bheith ag soláthraí seirbhísí idirmheánaithe ar líne cinneadh a dhéanamh deireadh a chur lena sheirbhísí a sholáthar, d'úsáideoir gnó áirithe, lena n-áirítear earraí nó seirbhísí aonair de chuid úsáideoirí gnó áirithe a dhíliostú nó torthaí cuardaigh a bhaint go héifeachtach. Mar sin féin, toisc go bhféadfadh na cinntí sin tionchar suntasach a imirt ar leasanna an úsáideora gnó sin, ba cheart na cúiseanna atá leis sin a **chur ar fáil** [...] **sula gcuirfí seirbhísí ar fionraí nó ag an tráth céanna, agus ráiteas faoi na cúiseanna leis an gcinneadh sin a chur ar fáil ar mheán mhalartach**. Ba cheart d'úsáideoirí gnó fáil amach ón ráiteas faoi na cúiseanna an bhfuil deis ann agóid a dhéanamh faoin gcinneadh, agus ar an gcaoi sin na deiseanna a bheadh ag úsáideoirí gnó sásamh éifeachtach a lorg a fheabhsú i gcás inar ghá, **lena n-áirítear d'fhonn soláthair earraí nó seirbhísí a athbhunú**. [...] ⁶. Ba cheart forais [...] an chinnidh sin a shainaithint sa ráiteas ar na cúiseanna, bunaithe ar na forais a bhí leagtha amach roimh ré ag an soláthraí sna téarmaí agus coinníollacha, agus go ndéanfaí tagairt ar dhóigh iomchuí do na himthosca ábhartha sonracha ba chúis leis an gcinneadh sin.

4 [...]]

(16a) Caillteanas ollmhór saineolais a bheadh ann dá gcuirfí deireadh leis na seirbhísí idirmheánaithe ar líne ar fad agus dá scriosfaí sonraí gaolmhara a fhoráiltear le haghaidh na seirbhísí idirmheánaithe ar líne nó a ghintear trí sholáthar na seirbhísí sin, agus d'fhéadfadh tionchar suntasach a bheadh aige sin ar úsáideoirí gnó agus d'fhéadfadh sé a bheith ina bhac orthu, freisin, cearta eile a thugtar faoin Rialachán seo a fheidhmiú mar is ceart. Dá bhrí sin, ba cheart do sholáthraí seirbhísí idirmheánaithe ar líne ráiteas faoi na cúiseanna leis an gcinneadh sin a chur in iúl, ar mheán mhalartach, don úsáideoir gnó lena mbaineann, 30 lá ar a laghad, sula mbeadh deireadh lena sheirbhísí idirmheánaithe ar líne go hiomlán. Mar sin féin, i gcás ina gcuirfidh oibleagáid rialála ceanglas ar sholáthraí seirbhísí idirmheánaithe ar líne deireadh a chur lena sheirbhísí uile idirmheánaithe ar líne d'úsáideoir gnó áirithe, ní bheidh feidhm ag an tréimhse fógra sin. Ar an gcaoi chéanna, ní bheidh feidhm ag an tréimhse fógra 30 lá i gcás soláthraí a chuirfidh a chearta foirceanta i bhfeidhm faoin dlí náisiúnta agus i gcomhréir le dlí an Aontais lenar ceadmhach foirceannadh láithreach a dhéanamh i gcás, agus imthosca uile an cháis shonraigh á chur san áireamh agus leas an dá pháirtí á mheá, nach féidir bheith ag súil leis go leanfaidh an gaol conarthach ar aghaidh go dtí an dáta deiridh a comhaontaíodh nó go dtí go rachaidh an tréimhse fógra in éag. D'fhonn comhréireacht a áirithiú, níor cheart do sholáthraithe seirbhísí idirmheánaithe ar líne ach cuid dá seirbhísí a chur ar fionraí nó a fhoirceannadh, amhail trí tháirgí nó seirbhísí sonracha an úsáideora gnó a dhíliostú, i gcás gurb iomchuí agus ina bhfuil sin indéanta go teicniúil. Is é seirbhísí iomlána a chur ar fionraí agus a fhoirceannadh an beart is déine.

- (17) I ndáil le rangú earraí agus seirbhísí ag soláthraithe seirbhísí idirmheánaithe ar líne, imríonn sin tionchar tábhachtach ar rogha an tomhaltóra agus, dá bharr sin, ar rathúnas tráchtála na n-úsáideoirí gnó a thairgeann na hearraí agus na seirbhísí sin do thomhaltóirí. **Baineann rangú leis an tsuntasacht choibhneasta a thugtar do thairiscintí na n-úsáideoirí gnó nó don ábharthacht a thugtar do thorthaí cuardaigh, arna gcur i láthair, arna n-eagrú agus arna gcur in iúl ag soláthraithe seirbhísí idirmheánaithe ar líne nó ag soláthraithe innill cuardaigh ar líne, mar thoradh ar an úsáid a bhaintear as algartam lena mbaineann seicheamhú, rátáil nó sásraí athbhreithniúcháin, buaicphointí atá dírithe ar an tsúil nó uirlisí aireachtála eile, nó cónaisc díobh sin.** Dá bharr sin, ba cheart do sholáthraithe seirbhísí idirmheánaithe ar líne na príomhpharaiméadair lena gcinnfear an rangú a leagan amach roimh ré, d'fhonn an intuarthacht a fheabhsú d'úsáideoirí gnó, chun ceadú dóibh feidhmiú an tsásra rangaithe a thuiscint níos fearr agus chun a chur ar a gcumas cleachtais rangaithe na soláthraithe éagsúla a chur i gcomparáid. Ba cheart a thuiscint go dtagraíonn an coincheap príomhpharaiméadar d'aon chritéir ghinearálta, próisis, comharthaí sonracha a chorpraítear in algartaim nó aon sásraí coigeartaithe nó íslithe a úsáidtear i ndáil leis an rangú.

(17a) Sa tuairisc ar na príomhpharaiméadair lena gcinntear an rangú ba cheart míniú a bheith ar na deiseanna a d'fhéadfadh a bheith ag úsáideoirí gnó tionchar gníomhach a imirt ar rangú os coinne luach saothair, mar aon le míniú ar na héifeachtaí coibhneasta a bhaineann leis sin. **Sa chás sin d'fhéadfadh sé go dtagraíonn luach saothair d'íocaíochtaí a rinneadh – agus é mar phríomhaidhm nó mar aidhm eisiach leo – rangú a fheabhsú, chomh maith le luach saothair indíreach arb é sin úsáideoir gnó ag glacadh le hoibleagáidí breise d'aon chineál ag a bhféadfadh sin a bheith mar éifeacht phraiticiúil, amhail úsáid a bhaint as scothghnéithe nó seirbhísí coimhdeacha. Maidir leis an gcur síos ar an inneachar, lena n-áirítear líon agus cineál na bpríomhpharaiméadar, d'fhéadfadh sé tarlú go mbeadh éagsúlacht mhór i gceist ag brath ar na seirbhísí sonracha idirmheánaithe ar líne nó ar an inneall cuardaigh ar líne lena mbaineann, ach** [...] ba cheart tuiscint leordhóthanach a thabhairt d'úsáideoirí gnó ar an gcaoi a gcuireann an sásra rangaithe tréithe na n-earraí agus na seirbhísí iarbhir a thairgeann an t-úsáideoir gnó san áireamh agus a n-ábharthacht sin do thomhaltóirí na seirbhísí idirmheánaithe sonracha ar líne. **Na táscairí sin lena dtomhaistear cáilíocht na n-earraí nó na seirbhísí a bhíonn ag úsáideoirí gnó; an úsáid a bhaintear as eagarthóirí maille lena gcumas tionchar a imirt ar rangú na n-earraí nó na seirbhísí céanna sin; a mhéid a fhágann tionchar an luacha saothair a lorg ar an rangú a dhéantar orthu; gan trácht ar eilimintí nach mbaineann ach ar éigean nó nach mbaineann ar chor ar bith leis an táirge nó leis an tseirbhís féin (amhail an chaoi a gcuirtear i láthair iad sa tairiscint ar líne), is rudaí iad sin ar fad a d'fhéadfaí a lua mar shamplaí de príomhpharaiméadair a bheidh ina gcuidiú – ach iad a chuimsiú sa chur síos ginearálta a thugtar, i gcaint shoiléir shothuigthe, ar an sásra rangaithe – ag úsáideoirí gnó chun tuiscint leordhóthanach riachtanach a fháil ar an gcaoi a bhfeidhmíonn sé.**

(18) Ar an gcaoi chéanna, imríonn an rangú a dhéanann soláthraithe innill chuardaigh ar líne, go háirithe na suíomhanna gréasáin sin trína dtairgeann gnóthais a n-earraí agus a seirbhísí do thomhaltóirí, imríonn sin tionchar mór ar rogha tomhaltóirí agus ar rathúnas tráchtála na n-úsáideoirí suíomhanna gréasáin corparáideacha. Fágann sin gur cheart do sholáthraithe inneall cuardaigh tuairisc a chur ar fáil ar na príomhpharaiméadair lena gcinntear rangú na suíomhanna gréasáin innéacsaithe uile, **agus ar an tábhacht choibhneasta a bhaineann leis na príomhpharaiméadair sin seachas paraiméadair eile**, lena n-áirítear suíomhanna úsáideoirí corparáideacha agus úsáideoirí suíomhanna eile. Mar aon le tréithe na n-earraí agus na seirbhísí agus a ábhartha atá siad ó thaobh na dtomhaltóirí de, ba cheart a cheadú i gcás innill chuardaigh ar líne d'úsáideoirí suíomhanna gréasáin corparáideacha ar líne tuiscint leordhóthanach a fháil an gcuirtear tréithe áirithe de dheardh an tsuímh suíomhanna gréasáin a úsáidtear san áireamh, amhail iad a optamú lena dtaispeáint ar ghléasanna cumarsáide móibíleacha, agus má chuirtear, conas a dhéantar sin agus an méid a dhéantar é **agus ba cheart míniú a thabhairt freisin ar na deiseanna a d'fhéadfadh a bheith ag úsáideoirí gnó tionchar gníomhach a imirt ar rangú os coinne luach saothair, mar aon le míniú a thabhairt freisin ar na héifeachtaí coibhneasta a bhaineann leis sin**. D'uireasa gaol conarthach idir soláthraithe inneall cuardaigh ar líne agus úsáideoirí suíomhanna corparáideacha, ba cheart an tuairisc sin a chur ar fáil don phobal in áit fhollasach atá inrochtana gan stró ar an inneall cuardaigh ábhartha ar líne. **Leis leathanaigh sin ar shuíomhanna gréasáin ar gá logáil isteach orthu nó clárú leo, níor cheart a thuiscint go mbeadh fáil orthu go furasta agus go poiblí sa chiall seo**. Chun intuarthacht a áirithiú d'úsáideoirí suíomhanna corparáideacha ba cheart an tuairisc a choinneáil cothrom le dáta, lena n-áirítear an deis aon athruithe ar na príomhpharaiméadair a bheith so-aitheanta.

(18a) Níor cheart a cheangal ar sholáthraithe seirbhísí idirmheánaithe ar líne ná ar sholáthraithe innill cuardaigh ar líne, feidhmiú mionsonraithe a sásraí rangaithe a nochtadh, lena n-áirítear a n-algartaim, faoin Rialachán seo. Ar an gcaoi chéanna, níor cheart dochar a dhéanamh dá gcumas gníomhú i gcoinne chúbláil mhailíseach ar rangú ag tríú páirtí, lena n-áirítear chun leas na dtomhaltóirí. Ba cheart, leis an gcur síos ginearálta ar na príomhpharaiméadair rangaithe, na leasanna sin a chaomhnú agus ag an am céanna tuiscint leordhóthanach a thabhairt d'úsáideoirí gnó agus d'úsáideoirí suíomhanna corparáideacha i dtaca le feidhmiú an rangaithe i gcomhthéacs a n-úsáid de sheirbhísí sonracha idirmheánaithe ar líne nó innill cuardaigh ar líne. Chun a áirithiú go mbainfear amach cuspóir an Rialacháin seo ní ceart leasanna tráchtála na soláthraithe seirbhísí idirmheánaithe ar líne nó na soláthraithe innill cuardaigh ar líne a bheith ina siocair gan na príomhpharaiméadair lena gcinntear rangú á nochtadh. I ndáil leis an méid sin, [...] ba cheart an cur síos a thabharfar a bheith bunaithe ar shonraí iarbhír maidir le hábharthacht na bparaiméadar rangaithe a úsáidfear. **I gcás ina meastar gur rúin trádála iad príomhpharaiméadair nó faisnéis maidir le tábhacht choibhneasta na bparaiméadar sin, beidh feidhm ag pointe (b) d'Airteagal 1(2) de Rialachán (AE) 2016/943.**

- (19) I gcás ina dtairgeann soláthraí seirbhísí idirmheánaithe féin earraí agus seirbhísí áirithe do thomhaltóirí trína sheirbhísí idirmheánaithe ar líne, nó ina ndéanann sé sin trí bhíthin úsáideoir gnó a bhfuil sé i gceannas air, féadann an soláthraí sin dul in iomaíocht go díreach le húsáideoirí gnó eile a bhaineann úsáid as a chuid seirbhísí idirmheánaithe ar líne nach bhfuil an soláthraí i gceannas orthu. Sna cásanna sin, go háirithe, tá sé tábhachtach go ngníomhóidh an soláthraí seirbhísí idirmheánaithe ar líne ar bhealach trédhearcach agus go dtabharfaidh sé tuairisc ar aon chóir dhifreáilte, cibé acu trí mhodhanna dlíthiúla, tráchtála nó teicniúla, a d'fhéadfadh sé a dhéanamh i ndáil le hearraí nó seirbhísí a thairgeann sé féin i gcomparáid leis na hearraí sin a thairgeann úsáideoirí gnó. Chun an chomhréireacht a áirithiú, ba cheart feidhm a bheith ag an oibleagáid sin maidir le leibhéal na seirbhísí idirmheánaithe foriomlána ar líne seachas maidir le leibhéal na n-earraí nó na seirbhísí aonair a thairgtear trí bhíthin na seirbhísí sin.
- (20) Leis an gcumas sonraí a rochtain agus a úsáid, lena n-áirítear sonraí pearsanta, is féidir cruthú luacha tábhachtach a chumasú sa gheilleagar ardáin ar líne, **ní hamháin i gcoitinne ach freisin, do na húsáideoirí gnó agus na seirbhísí idirmheánaithe ar líne atá bainteach leis.** Dá réir sin, tá sé tábhachtach go dtabharfaidh soláthraithe seirbhísí idirmheánaithe ar líne tuairisc shoiléir d'úsáideoirí gnó ar raon feidhme agus cineál na rochtana atá acu ar chatagóirí áirithe sonraí agus na húsáide a bhaineann siad astu, agus na coinníollach a bhaineann leis an rochtain agus an úsáid sin. Ba cheart an tuairisc sin a bheith comhréireach agus go dtagródh sé do choinníollacha ginearálta maidir le rochtain, de rogha ar shainaithint uileghabhálach sonraí nó catagóirí sonraí, d'fhonn a chur ar a gcumas d'úsáideoirí gnó a dhéanamh amach an féidir leo na sonraí a úsáid chun cruthú luacha a fheabhsú, lena n-áirítear, b'fhéidir, trí sheirbhísí sonraí tríú páirtithe a choinneáil. **Is príomhfhoinsé nuálaíochta agus fáis na bearta trédhearcachta sin agus d'fhéadfaidís cuidiú le méadú na comhroinnte sonraí agus, ina theannta sin, feabhas a chur ar na haidhmeanna lena gcruthófar spás coiteann Eorpach do shonraí.** Ba cheart **rialacha cosanta sonraí an Aontais agus go háirithe** Rialachán (AE) Uimh. 2016/679 ó Pharlaimint na hEorpa agus ón gComhairle a chomhlíonadh maidir leis an bpróiseáil sonraí pearsanta.⁷

⁷ Rialachán (AE) 2016/679 ó Pharlaimint na hEorpa agus ón gComhairle an 27 Aibreán 2016 maidir le daoine nádúrtha a chosaint i ndáil le sonraí pearsanta a phróiseáil agus maidir le saorghluaiseacht sonraí den sórt sin, agus lena n-aisghairtear Treoir 95/46/CE (An Rialachán Ginearálta maidir le Cosaint Sonraí) (Téacs atá ábhartha maidir le LEE) (IO L 119, 4.5.2016, lch. 1).

- (21) I gcásanna áirithe d'fhéadfadh soláthraithe seirbhísí idirmheánaithe ar líne srian a chur, sna téarmaí agus coinníollacha, ar an gcumas atá in úsáideoirí gnó earraí nó seirbhísí a thairiscint do thomhaltóirí ar choinníollacha níos fabhraí ar bhealaí seachas trí na seirbhísí idirmheánaithe ar líne sin. Sna cásanna sin, ba cheart do na soláthraithe lena mbaineann na forais ar a ndéanfar an méid sin a dhéanamh a leagan amach, go háirithe i ndáil le príomhbhreithnithe eacnamaíocha, tráchtála nó dlí na srianta. Níor cheart a thuiscint go ndéanfaí difear leis an oibleagáid trédhearcachta do mheasúnú dhlíthiúlacht na srianta sin faoi ghníomhartha eile de dhlí an Aontais nó den dlí náisiúnta i gcomhréir le dlí an Aontais, lena n-áirítear i réimsí na hiomaíochta agus na gcleachtas tráchtála éagóir, agus cur i bhfeidhm na ndlíthe sin.
- (22) Lena chur ar a gcumas d'úsáideoirí gnó, lena n-áirítear na húsáideoirí sin a d'fhéadfadh an cead a bheadh acu na seirbhísí idirmheánaithe ar líne a úsáid a bheith curtha ar fionraí nó foirceannta, rochtain a fháil ar dheiseanna sásaimh láithreacha oiriúnacha éifeachtacha, ba cheart do sholáthraithe seirbhísí idirmheánaithe ar líne foráil a dhéanamh maidir le córas inmheánach chun déileáil le gearáin. Leis an gcóras inmheánach chun déileáil le gearáin ba cheart a áirithiú gur féidir leis an soláthraí seirbhísí idirmheánaithe ar líne agus an úsáideoir gnó is ábhartha sciar suntasach de na gearáin a réiteach go déthaobhach. Ina theannta sin, dá n-áireofaí go bhfoilseodh na soláthraithe seirbhísí idirmheánaithe ar líne faisnéis maidir le feidhmiú agus éifeachtacht a gcóras inmheánach chun déileáil le gearáin ba cheart go gcuideodh sin le húsáideoirí gnó tuiscint a fháil ar na cineálacha saincheistanna a d'fhéadfadh teacht chun cinn i gcomhthéacs seirbhísí idirmheánaithe difriúla ar líne a sholáthar agus ar na deiseanna atá ann teacht ar réiteach déthaobhach gasta éifeachtach.

(23) Is é is aidhm le ceanglais an Rialacháin seo maidir le córais inmheánacha chun déileáil le gearáin méid réasúnach solúbthachta a cheadú do sholáthraithe seirbhísí idirmheánaithe ar líne agus na córais sin a bhfeidhmiú acu agus iad ag déileáil le gearáin aonair ionas go laghdófar aon ualach riaracháin a bheidh ann. Ina theannta sin, leis na córais inmheánacha chun déileáil le gearáin ba cheart ceadú do sholáthraithe seirbhísí idirmheánaithe ar líne dul i ngleic, i gcás inar gá agus ar bhealach iomchuí, le haon úsáid a dhéanfaidh úsáideoirí gnó áirithe iarracht a bhaint as na córais sin de mheon mímhacánta. [...] I bhfianaise na gcostas a bhaineann leis na córais sin a bhunú agus a fheidhmiú, is iomchuí aon soláthraithe seirbhísí idirmheánaithe ar líne ar fiontair bheaga iad a dhíolmhú ó na hoibleagáidí sin, i gcomhréir le forálacha ábhartha de Mholadh 2003/361/CE ón gCoimisiún⁸. **Áiritheofar leis na rialacha maidir le comhdhlúthú a leagtar síos sa Mholadh seo nach mbeifear in ann teacht timpeall air. Mar sin féin, níor cheart go ndéanfaidh an díolúine sin difear do cheart na bhfiontar sin córas inmheánach chun déileáil le gearáin, a chomhlíonann na critéir a leagtar amach sa Rialachán seo, a chur ar bun ar bhonn deonach.**

⁸ [...]

(24) Leis an idirghabháil tugtar do sholáthraithe seirbhísí idirmheánaithe ar líne agus dá n-úsáideoirí gnó modh chun díospóidí a réiteach ar bhealach sásúil gan an gá dul i mbun imeachtaí dlíthiúla, rud a bhíonn fadálach costasach uaireanta. Dá bharr sin, ba cheart do sholáthraithe seirbhísí idirmheánaithe ar líne an idirghabháil a éascú, go háirithe, trí **bheirt idirghabhálaithe phoiblí nó phríobháideacha, ar a laghad**, a mbeidís sásta déileáil leo, a shainaithint. **Neodracht na n-idirghabhálaithe a chosaint is aidhm d'íoslíon na n-idirghabhálaithe a shainítear**. Níor cheart idirghabhálaí a chuireann a seirbhísí ar fáil ó áit atá lasmuigh den Aontas a shainaithint ach amháin, i gcás ina n-úsáidtear na seirbhísí sin, má ráthaítear nach ndéanfar aon chosaint dlíthiúil a thugtar do na húsáideoirí gnó lena mbaineann faoi dhlí an Aontais nó faoin dlí náisiúnta a cheilt orthu, lena n-áirítear ceanglais an Rialacháin seo agus an dlí is infheidhme a bhaineann le sonraí pearsanta agus rúin trádála a chosaint. Chun bheith chomh hinrochtana cóir gasta éifeachtúil agus éifeachtach agus is féidir, ba cheart do na hidirghabhálaithe sin critéir shocraithe áirithe a chomhlíonadh. **Mar sin féin, fágтар faoi sholáthraithe seirbhísí idirmheánaithe ar líne agus a n-úsáideoirí gnó cinneadh a dhéanamh eatarthu féin pé idirghabhálaí is ansa leo a roghnú d'fhonn díospóid atá tagtha chun cinn eatarthu a réiteach. I gcomhréir le Treoir (AE) Uimh. 2008/52 is próiseas deonach idir an soláthraí agus an t-úsáideoir gnó atá i gceist leis an tseirbhís idirmheánaithe a luaitear sa Rialachán; is faoin dá pháirtí tús agus críoch a chur leis an bpróiseas ag pé tráth a thograíonn siad. Bíodh is gur próiseas deonach atá i gceist, ba cheart do sholáthraithe seirbhísí idirmheánaithe ar líne scrúdú a dhéanamh de mheon macánta ar iarrataí a dhéantar orthu tabhairt faoin tseirbhís idirmheánaithe dá bhforáiltear sa Rialachán seo.**

- (25) Ba cheart do sholáthraithe seirbhísí idirmheánaithe ar líne cion réasúnach de chostais uile an idirmheánaigh a sheasamh agus gnéithe ábhartha uile an cháis i dtrácht á gcur san áireamh. Chun na críche sin, ba cheart don idirghabhálaí a mholadh cé acu coibhneas is réasúnach i ngach cás aonair. **[...] I bhfianaise na gcostas agus an t-ualach riaracháin a bhaineann leis an ngá idirghabhálaithe a shainaithint sna téarmaí agus sna coinníollacha, is iomchuí aon soláthraithe seirbhísí idirmheánaithe ar líne ar fiontair bheaga iad a dhíolmhú ón oibleagáid sin, i gcomhréir le forálacha ábhartha de Mholadh 2003/361/CE ón gCoimisiún. Áirithíonn na rialacha maidir le comhdhlúthú a leagtar síos sa Mholadh seo nach mbeifear in ann teacht timpeall air. Mar sin féin, níor cheart go ndéanfadh sé sin difear do cheart na bhfiontar sin idirghabhálaithe a shainaithint sna téarmaí agus sna coinníollacha, a chomhlíonann na critéir a leagtar amach sa Rialachán seo.**
- (26) D'fhonn réiteach díospóidí a bhaineann le soláthar seirbhísí idirmheánaithe ar líne a éascú trí idirghabháil a dhéanamh san Aontas, ba cheart don Choimisiún bunú eagraíochtaí idirmheánaithe speisialaithe a spreagadh, rud atá de dhíth faoi láthair. Rannpháirteachas idirghabhálaithe a mbeadh eolas speisialaithe acu ar sheirbhísí idirmheánaithe ar líne agus ar innill chuardaigh ar líne agus ar earnálacha sonracha den tionscal ina soláthraítear na seirbhísí seo, ba cheart go gcuirfeadh an rannpháirteachas sin leis an muintín atá ag an dá pháirtí as an bpróiseas idirmheánaithe agus ba cheart é a bheith níos dóchúla go dtiocfadh as an bpróiseas sin toradh gasta cóir sásúil.

(27) De thoradh tosa éagsúla, amhail acmhainní airgeadais teoranta, an eagla roimh dhíoltas agus gan ach an saghas sin rogha a bheith le fáil de réir na dtéarmaí agus coinníollacha, is féidir teorainn a bheith le héifeachtacht na ndeiseanna sásaimh bhreithiúnaigh atá ann, na deiseanna sin go háirithe lena gceanglaítear ar úsáideoirí gnó nó úsáideoirí suíomhanna corparáideacha gníomhú ina n-aonar nó ar bhealach ina n-aithneofaí iad. Chun cur i bhfeidhm éifeachtach an Rialacháin seo a áirithiú, ba cheart an deis a thabhairt d'eagraíochtaí, do chomhlachais a dhéanann ionadaíocht ar úsáideoirí gnó nó úsáideoirí suíomhanna gréasáin corparáideacha, mar aon le comhlachtaí poiblí áirithe atá bunaithe sna Ballstáit, caingean a thabhairt os comhair cúirteanna náisiúnta **i gcomhréir leis an dlí náisiúnta, lena n-áirítear ceanglais náisiúnta nósanna imeachta**. Ba cheart gurbh é an aidhm le caingean den sórt sin os comhair cúirt náisiúnta sárúithe ar na rialacha a leagtar amach sa Rialachán seo a stopadh nó a chosc agus díobháil a chosc sa todhchaí a d'fhéadfadh an bonn a bhaint den ghaol gnó inbhuanaithe sa gheilleagar ardáin ar líne. Lena áirithiú go bhfeidhmeoidh na heagraíochtaí nó na comhlachais sin an ceart sin go héifeachtach agus go hiomchuí, ba cheart dóibh critéir áirithe a chomhlíonadh. **Go sonrach, caithfidh siad a bheith comhdhéanta go cuí i gcomhréir le dlí Ballstáit ar leith, bheith ina eagraíochtaí neamhbhrabúsacha agus a gcuspóirí a chur i gcrích ar bhonn leanúnach. Ba cheart go gcuirfeadh na ceanglais seo cosc ar chomhdhéanamh ad hoc eagraíochtaí nó comhlachas chun críche gníomh nó gníomhartha sonracha, nó chun críche brabús a dhéanamh. Thairis sin, ba cheart go gcuirfeadh nochtadh iomlán, poiblí den fhaisnéis faoi bhallraíocht, faoin struchtúr rialachais agus faoi airgeadas cosc ar aon tionchar míchuí ó sholáthraithe tríú páirtí maoinithe. D'fhonn coinbhleacht leasa a sheachaint, níor cheart d'eagraíochtaí nó do chomhlachais a dhéanann ionadaíocht ar úsáideoirí gnó nó úsáideoirí suíomhanna gréasáin corparáideacha glacadh le maoiniú ó sholáthraithe seirbhísí idirmheánaithe ar líne ná ó innill cuardaigh ar líne.** I bhfianaise an stádaís ar leith atá ag na comhlachtaí poiblí ábhartha sna Ballstáit inar cuireadh na comhlachtaí sin ar bun, ba cheart gurb ar na comhlachtaí sin amháin a cheanglófaí go leithleach, i gcomhréir le rialacha ábhartha an dlí náisiúnta, na caingne sin a thabhairt ar mhaithe le leasanna coiteanna na bpáirtithe lena mbaineann nó ar mhaithe leis an leas ginearálta, gan aon ghá a bheith ann na critéir sin a chur i bhfeidhm maidir leis na comhlachtaí sin.

(27a) Ba cheart na heagraíochtaí, na comhlachais agus na comhlachtaí poiblí sin atá cáilithe, dar leis na Ballstáit, chun caingean a thionscnamh i gcomhréir le forálacha an Rialacháin seo, a chur in iúl don Choimisiún. Le linn a leithéid de chumarsáid, ba cheart go ndéanfaidh na Ballstáit tagairt ar leith do na forálacha ábhartha náisiúnta ar comhrinneadh an eagraíocht, an comhlachas nó an comhlacht poiblí dá réir, agus, pé áit arb iomchuí, tagairt a dhéanamh don chlár poiblí ábhartha inar cláraíodh an eagraíocht nó an comhlacht. Ba cheart go dtabharfaidh an rogha bhreise seo atá ainmnithe ag na Ballstáit leibhéal áirithe de dheimhneacht dhlíthiúil agus d'intuathacht ar féidir le húsáideoirí gnó agus le húsáideoirí suíomhanna gréasáin corparáideacha brath air. Ag an am céanna, féachann sé le nósanna imeachta breithiúnacha a dhéanamh níos éifeachtúla agus níos giorra, rud a mheastar a bheith iomchuí sa chomhthéacs sin. Ba cheart don Choimisiún a áirithiú go bhfoilseofar liosta de na heagraíochtaí, na comhlachais agus na comhlachtaí poiblí sin in *Iris Oifigiúil an Aontais Eorpaigh*; beidh an liosta sin ina fhianaise inbhréagnaithe maidir le hinniúlacht dhlíthiúil na heagraíochta, an chomhlachais nó an chomhlachta poiblí atá i mbun na caingne. I gcás go bhfuil aon chúis inní maidir le hainmniú, is ceart don Bhallstát a d'ainmnigh an eagraíocht, an comhlachas nó an comhlacht poiblí na húdair inní sin a fhiosrú. Ba cheart an fhéidearthacht a bheith ag eagraíochtaí, comhlachais, agus comhlachtaí poiblí nach n-ainmnítear ag Ballstát, cás a thabhairt os comhair na gcúirteanna náisiúnta, agus is ceart dóibh siúd an inniúlacht dhlíthiúil a scrúdú de réir na gcritéar a shocraítear sa Rialachán seo. Ba cheart nach ndéanfaidh caingne den sórt sin aon difear do na cearta atá ag úsáideoirí gnó agus úsáideoirí suíomhanna suíomhanna gréasáin caingean bhreithiúnach a thabhairt.

(27B) Tá córais dhifriúla forfheidhmithe sna Ballstáit cheana féin agus níor cheart go mbeadh ceangal orthu comhlachtaí náisiúnta forfheidhmithe nua a chur ar bun. Tá sé de rogha ag Ballstáit forfheidhmiú an Rialacháin seo a fhágáil faoi na húdaráis atá ann cheana féin, cúirteanna san áireamh. Níor cheart go gcuirfeadh an Rialachán seo ceangal ar na Ballstáit foráil a dhéanamh d'fhorfheidhmiú *acq officio* ná do ghearradh fíneálacha.

- (28) Féadfar le cóid iompair, a tharraingeoidh suas na soláthraithe seirbhísí lena mbaineann, nó na heagraíochtaí nó na comhlachais a dhéanann ionadaíocht orthu, rannchuidiú le cur chun feidhme cuí an Rialacháin seo agus dá bharr sin ba cheart an méid sin a spreagadh. Agus na cóid iompair sin á dtarraingt suas, i gcomhairle leis na páirtithe leasmhara, ba cheart aird chuí a thabhairt ar ghnéithe sonracha na n-earnálacha lena mbaineann agus ar thréithe na micrifhiontar agus na bhfiontar beag agus meánmhéide. **Ba cheart na Cóid Iompair sin a bheith i gcaint oibiachtúil neamh-idirdhealaitheach ar mhaithe le bacainní iontrála nach bhfuil gá leo a sheachaint.**
- (29) Ba cheart don Choimisiún an Rialachán seo a mheasúnú go tráthrialta, go háirithe d'fhonn an gá atá le leasuithe a mheas i bhfianaise forbairtí teicneolaíochta agus forbairtí tráchtála. **D'fhonn radharc níos leithne a fháil ar fhorbairtí, ba cheart don mheastóireacht taithí na mBallstát agus na bpáirtithe leasmhara ábhartha a chur san áireamh.**
- (30) Agus an fhaisnéis a cheanglaítear faoin Rialachán á cur ar fáil, ba cheart riachtanais ar leith atá ag daoine faoi mhíchumas a chur san áireamh a mhéid is féidir, i gcomhréir le cuspóirí Choinbhinsiún na Náisiún Aontaithe ar Chearta Daoine faoi Mhíchumas⁹.
- (31) Ós rud é nach féidir leis na Ballstáit cuspóir an Rialacháin seo, **eadhon gnéithe áirithe de thrédhearcacht agus sásamh a rialú d'fhonn** timpeallacht ghnó ar líne iontaofa inbhuanaithe intuartha cóir a áirithiú laistigh den mhargadh inmheánach, a ghnóthú go leordhóthanach agus, de bharr fhairsinge agus éifeachtaí an Rialacháin, gur fearr is féidir é a ghnóthú ar leibhéal an Aontais, féadfaidh an tAontas bearta a ghlacadh i gcomhréir le prionsabal na coimhdeachta a leagtar amach in Airteagal 5 den Chonradh ar an Aontas Eorpach. I gcomhréir le prionsabal na comhréireachta a leagtar amach san Airteagal sin, ní théann an Rialachán seo thar a bhfuil riachtanach chun an cuspóir arna shaothrú a ghnóthú.

⁹ Coinbhinsiún na Náisiún Aontaithe ar Chearta Daoine faoi Mhíchumas (UNCRPD), ar fáil ag: <https://www.un.org/development/desa/disabilities/convention-on-the-rights-of-persons-with-disabilities.html>

(32) [...]

(33) Féachann an Rialachán lena áirithiú go dtabharfar urraim iomlán don cheart chun leigheas éifeachtaigh, chun trialach córa agus le cur chun cinn a dhéanamh ar an tsaoirse gnó a sholáthar, a leagtar amach in Airteagal 47 agus Airteagal 16 den Chairt um Chearta Bunúsacha an Aontais Eorpaigh faoi seach.

TAR ÉIS AN RIALACHÁN SEO A GHLACADH:

Airteagal 1

Ábhar agus raon feidhme

1. Is é **cuspóir an** Rialacháin seo **rannchuidiú le feidhmiú cuí an mhargaidh inmheánaigh trí** [...] rialacha a **leagan** síos [...] lena áirithiú go gcuirtear trédhearcacht iomchuí agus deiseanna éifeachtacha sásaimh ar fáil d'úsáideoirí gnó a bhaineann leas as seirbhísí idirmheánaithe ar líne agus d'úsáideoirí suíomhanna gréasáin corparáideacha i dtaca le hinnill chuardaigh ar líne.
2. Beidh feidhm ag an Rialachán seo maidir le seirbhísí idirmheánaithe ar líne agus innill chuardaigh ar líne a sholáthraítear, nó a thairgtear a sholáthar, d'úsáideoirí gnó agus d'úsáideoirí suíomhanna gréasáin corparáideacha, faoi seach, a bhfuil a n-áit bhunaíochta nó a n-áit chónaithe san Aontas agus a thairgeann, trí sheirbhísí idirmheánaithe ar líne nó trí innill chuardaigh ar líne, earraí nó seirbhísí do thomhaltóirí atá lonnaithe san Aontas, beag beann ar áit bhunaíochta nó áit chónaithe sholáthraithe na seirbhísí sin **agus beag beann ar an dlí is infheidhme seachas sin.**

3. Beidh an rialachán seo gan dochar do na rialacha náisiúnta lena ndéantar iompar aontaobhach nó cleachtais trádála éagóracha a chosc nó smachtbhannaí a ghearradh, i gcomhréir le dlí an Aontais. Ní dhéanfaidh an Rialachán seo difear don dlí sibhialta náisiúnta, go háirithe do dhlí na gconarthaí, amhail na rialacha maidir le bailíocht, déanamh, éifeacht, nó foirceannadh conartha, a mhéid atá na rialacha náisiúnta maidir leis an dlí sibhialta i gcomhréir le dlí an Aontais agus a mhéid nach gcumhdaítear na gnéithe ábhartha faoi fhorálacha an Rialacháin seo.
4. Beidh an Rialachán seo gan dochar don chuid sin de dhlí an Aontais is infheidhme i réimse an chomhair bhreithiúnaigh ar ábhair shibhialta, na hiomaíochta, na cosanta sonraí, na cosanta um rúin trádála, na cosanta tomhaltóirí, na ríomhthráchtála agus na seirbhísí airgeadais.

Airteagal 2

Sainmhínithe

Chun críocha an Rialacháin seo, tá feidhm ag na sainmhínithe seo a leanas:

- (1) ciallaíonn ‘úsáideoir gnó’ aon duine nádúrtha nó dlítheanach a thairgeann earraí nó seirbhísí do thomhaltóirí trí sheirbhísí idirmheánaithe ar líne chun críocha a bhaineann lena thrádáil, lena ghnó, lena cheird nó lena ghairm;
- (2) ciallaíonn ‘seirbhísí idirmheánaithe ar líne’ seirbhísí a chomhlíonann na riachtanais seo a leanas go léir:
 - (a) is é atá iontu seirbhísí de chuid na sochaí faisnéise de réir bhrí Airteagal 1(1)(b) de Threoir (AE) Uimh. 2015/1535 ó Pharlaimint na hEorpa agus ón gComhairle¹⁰;

¹⁰ Treoir (AE) 2015/1535 ó Pharlaimint na hEorpa agus ón gComhairle an 9 Meán Fómhair 2015 lena leagtar síos nós imeachta chun faisnéis a sholáthar i réimse na rialachán teicniúil agus na rialacha maidir le seirbhísí na Sochaí Faisnéise (IO L 241, 17.9.2015, lch. 1).

- (b) tugann siad deis d'úsáideoirí gnó earraí nó seirbhísí a thairiscint do thomhaltóirí, d'fhonn tionscnamh idirbheart díreach idir na húsáideoirí gnó agus na tomhaltóirí sin a éascú, beag beann ar an áit a dtugtar na hidirbhearta sin chun críche;
- (c) soláthraítear d'úsáideoirí gnó iad ar bhonn gaolta conarthacha idir [...] soláthraí na seirbhísí sin agus [...] úsáideoirí gnó, **a thairgeann earraí nó seirbhísí do thomhaltóirí** [...];
- (3) ciallaíonn ‘soláthraí seirbhísí idirmheánaithe ar líne’ aon duine nádúrtha nó dlítheanach a sholáthraíonn seirbhísí idirmheánaithe ar líne d'úsáideoirí gnó, nó a thairgeann iad a sholáthar dóibh;
- (4) ciallaíonn ‘tomhaltóir’ aon duine nádúrtha a ghníomhaíonn lasmuigh dá thrádáil, dá ghnó, dá cheird nó dá ghairm;
- (5) ciallaíonn 'inneall cuardaigh ar líne' seirbhís dhigiteach a thugann deis d'úsáideoirí cuardaigh a dhéanamh, i bprionsabal, ar gach suíomh gréasáin nó ar shuíomhanna gréasáin i dteanga faoi leith ar bhonn fiosraithe ar aon ábhar i bhfoirm eochairfhocail, frása nó ionchuir eile, agus a sheolann [...] **torthaí ar ais in aon fhormáid** ina bhfuil faisnéis le fáil a bhaineann leis an ábhar a iarradh;
- (6) ciallaíonn ‘soláthraí innill cuardaigh ar líne’ aon duine nádúrtha nó dlítheanach a sholáthraíonn innill cuardaigh ar líne do thomhaltóirí, nó a thairgeann iad a sholáthar dóibh;
- (7) ciallaíonn ‘úsáideoir suíomhanna gréasáin chorparáidigh’ aon duine nádúrtha nó dlítheanach a úsáideann [...] **comhéadan ar líne, rud a chiallaíonn aon bhogearraí, lena n-áirítear suíomh gréasáin nó cuid de agus feidhmchláir, lena n-áirítear feidhmchláir mhóibíleacha**, chun earraí nó seirbhísí a thairiscint do thomhaltóirí chun críocha a bhaineann lena thrádáil, lena ghnó, lena cheird nó lena ghairm;

- (8) ciallaíonn 'rangú' an tsuntasacht choibhéiseach a thugtar do na hearraí nó na seirbhísí a thairgtear [...] trí sheirbhísí idirmheánaithe ar líne, nó [...] **an tábhacht a leagann** innill chuardaigh ar líne **ar** [...] **thorthaí cuardaigh**, arna gcur i láthair, arna n-eagrú agus arna gcur in iúl [...] ag soláthraithe na seirbhísí idirmheánaithe ar líne nó ag soláthraithe innill chuardaigh ar líne, faoi seach, beag beann ar na modhanna teicneolaíocha a úsáidtear don chur i láthair, don eagrúchán nó don chumarsáid sin;
- (9) ciallaíonn 'rialú' úinéireacht ghnóthais, nó an cumas tionchar cinntitheach a imirt ar ghnóthas, de réir bhrí Airteagal 3(2) de Rialachán (CE) 139/2004 ón gComhairle¹¹;
- (10) ciallaíonn 'téarmaí agus coinníollacha' na téarmaí **agus** coinníollacha **nó** sonraíochtaí go léir, beag beann ar a n-ainm nó ar a bhfoirm, lena rialaítear an gaol conarthach idir soláthraí na seirbhísí idirmheánaithe ar líne agus a n-úsáideoirí gnó agus a chinneann soláthraí na seirbhísí idirmheánaithe ar líne go haontaobhach.
- (11) ciallaíonn 'idirghabháil' aon phróiseas struchtúrtha mar a shainmhínítear in Airteagal 3(a) de Threoir (AE) Uimh. 2008/52 ó Pharlaimint na hEorpa agus ón gComhairle maidir le gnéithe áirithe d'idirghabháil in ábhair shibhialta agus tráchtála.**
- (12) ciallaíonn 'meán marthanach' aon ionstraim trínar féidir le húsáideoirí gnó faisnéis a díriodh chucu go pearsanta a stóráil ionas gur féidir tagairt di ina dhiaidh sin go ceann tréimhse leordhóthanach chun críocha na faisnéise sin agus ionas gur féidir an fhaisnéis atá stóráilte a atáirgeadh gan í a athrú.**

¹¹ Rialachán (CE) Uimh. 139/2004 ón gComhairle an 20 Eanáir 2004 maidir le comhchruinnithe a rialú idir gnóthais (Rialachán um Chumaisc CE) (IO L 24, 29.1.2004, lch. 1).

Airteagal 3 Intuarthacht na [...] dtéarmaí agus na gcoinníollacha

1. Áiritheoidh soláthraithe seirbhísí idirmheánaithe ar líne go bhfuil an méid seo a leanas i gceist lena gcuid téarmaí agus coinníollacha:

- (a) tá siad dréachtaithe i [...] bhfoclaíocht **shoiléir shothuigthe**;
- (b) tá siad ar fáil go héasca ag úsáideoirí gnó ar feadh chéimeanna iomlána an ghaoil tráchtála le soláthraí na seirbhísí idirmheánaithe ar líne, lena n-áirítear ag an gcéim reámhchonarthaigh;
- (c) leagtar amach iontu na forais [...] maidir le cinntí deireadh a chur lena seirbhísí idirmheánaithe ar líne a sholáthar, i bpáirt nó go hiomlán, d'úsáideoirí gnó, nó iad a chur ar fionraí.

2. [...]

[...] Tabharfaidh soláthraithe seirbhísí idirmheánaithe ar líne fógra **ar mheán marthanach** do na [...] húsáideoirí gnó lena mbaineann i dtaca le haon mhodhnuithe atá [...] **beartaithe** ar a dtéarmaí agus a gcoinníollacha.

Ní chuirfear na modhnuithe atá [...] **beartaithe** chun feidhme sula rachaidh tréimhse fógra in éag atá réasúnta agus comhréireach le cineál agus réim na modhnuithe atá beartaithe agus lena n-iarmhairtí don úsáideoir gnó lena mbaineann. Mairfidh an tréimhse fógra sin 15 lá ar a laghad ón dáta a thugann an soláthraí seirbhísí idirmheánaithe ar líne fógra do na húsáideoirí gnó lena mbaineann faoi na [...] modhnuithe atá **beartaithe**.

Féadfaidh an t-úsáideoir gnó lena mbaineann an tréimhse fógra dá dtagraítear sa dara fómhír a tharscaoileadh, cibé acu trí ráiteas i scríbhinn nó trí ghníomhaíocht shoiléir dhearfach **tráth ar bith tar éis an fógra a fháil**.

3. [...] Ní bheidh téarmaí agus coinníollacha, ná forálacha sonracha díobh, nach bhfuil ag teacht le ceanglais mhír 1, ná modhnuithe ar théarmaí agus coinníollacha arna gcur chun feidhme ag soláthraí seirbhísí idirmheánaithe ar líne, contrártha le forálacha mhír 2, ní bheidh siad ina gceangal ar an úsáideoir gnó lena mbaineann.
4. [...] I gcás ina bhfuil soláthraí seirbhísí idirmheánaithe ar líne faoi réir oibleagáid rialála [...] a cheanglaíonn air a théarmaí agus a choinníollacha a athrú ar bhealach nach ligeann dó an tréimhse fógra dá dtagraítear sa dara fomhír de mhír 2 [...] a urramú, ní bheidh feidhm ag an tréimhse fógra sin.

Airteagal 4

Fionraí agus foirceannadh

[...] [...]

[...] [...]

1. I gcás ina ndéanann soláthraí seirbhísí idirmheánaithe ar líne cinneadh soláthar a sheirbhísí idirmheánaithe ar líne d'úsáideoir gnó áirithe maidir le hearraí nó seirbhísí aonair a chuireann an t-úsáideoir gnó sin ar fáil a chur ar fionraí, cuirfidh sé ráiteas na gcúiseanna leis an gcinneadh sin ar fáil don úsáideoir gnó lena mbaineann, roimh an bhfionraíocht nó ag an am céanna léi, agus ar mheán marthanach.
2. I gcás ina ndéanann soláthraí seirbhísí idirmheánaithe ar líne cinneadh deireadh a chur lena sheirbhísí idirmheánaithe uile ar líne a sholáthar d'úsáideoir gnó áirithe, cuirfidh sé ráiteas na gcúiseanna leis an gcinneadh sin ar fáil don úsáideoir gnó lena mbaineann ar mheán marthanach, ar a laghad 30 lá sula dtagann an cinneadh sin in éifeacht.
3. Ní bheidh an tréimhse fógra i mír 2 i gceist maidir le soláthraí seirbhísí idirmheánaithe ar líne:

 - (a) i gcás ina bhfuil sé faoi réir oibleagáid rialála a cheanglaíonn air deireadh a chur le soláthar uile a chuid seirbhísí idirmheánaithe ar líne d'úsáideoir gnó ar leith ar bhealach nach dtugann deis dó an tréimhse fógra seo a urramú, nó
 - (b) i gcás ina bhfuil sé ag cleachtadh ceart chun foirceannadh faoi chúis sháraitheach de bhun dlí náisiúnta atá i gcomhréir le dlí an Aontais.

Cuirfidh an soláthraí seirbhísí idirmheánaithe ar líne ráiteas na gcúiseanna leis an gcinneadh sin ar mheán marthanach ar fáil don úsáideoir gnó lena mbaineann, gan aon mhoill mhíchuí.

4. Beidh tagairt sa ráiteas faoi na cúiseanna dá dtagraítear i mír 1 agus 2 do na fíricí sonracha nó do na cúinsí sonracha ba chúis leis an gcinneadh ó sholáthraí na seirbhísí idirmheánaithe ar líne, chomh maith le tagairt do na forais infheidhme a bhí leis an gcinneadh sin dá dtagraítear in Airteagal 3(1)(c).

Airteagal 5

Sainmhínithe

1. Leagfaidh soláthraithe seirbhísí idirmheánaithe ar líne amach ina dtéarmaí agus ina gcoinníollacha na príomhpharaiméadair lena gcinntítear rangú [...] agus tábhacht choibhéiseach na bpríomhpharaiméadar sin i gcodarsnacht le paraiméadair eile.

[...]
2. Leagfaidh soláthraithe innill cuardaigh ar líne amach d'úsáideoirí suíomhanna gréasáin corparáideacha na príomhpharaiméadair lena gcinntear rangú **agus tábhacht choibhéiseach na bpríomhpharaiméadar sin i gcomparáid le paraiméadair eile**, [...] trí thuairisc a sholáthar atá ar fáil go héasca agus go poiblí agus atá dréachtaithe i bhfoclaíocht **shoiléir shothuigthe** [...] maidir le hinnill cuardaigh ar líne na soláthraithe sin. Coinneoidh siad an tuairisc sin cothrom le dáta.
- 2a. **I gcás ina n-áirítear sna príomhpharaiméadair sin an fhéidearthacht difear a dhéanamh do luach saothair díreach nó indíreach a íocann úsáideoirí gnó nó úsáideoirí suíomhanna gréasáin corparáideacha lena soláthraí faoi seach, leagfaidh an soláthraí sin amach cur síos ar na féidearthachtaí sin agus ar éifeachtaí luach saothair den sórt sin ar rangú i gcomhréir leis na ceanglais a leagtar amach i mír 1 agus i mír 2.**

3. Beidh na tuairiscí dá dtagraítear i mír 1, i mír 2 [...] **agus i mír 2a** cuimsitheach agus cruinn go leor chun gur féidir leis na húsáideoirí gnó nó na húsáideoirí suíomhanna gréasáin corparáideacha tuiscint leordhóthanach a fháil an gcuirtear an méid seo a leanas san áireamh leis an sásra rangaithe, agus má chuirtear, conas a dhéantar sin agus an méid a dhéantar é:
- (a) airíonna na n-earraí agus na seirbhísí a thairgtear do thomhaltóirí trí bhíthin na seirbhísí idirmheánaithe ar líne nó an innill cuardaigh ar líne;
 - (b) ábharthacht na n-airíonna sin ó thaobh na dtomhaltóirí sin de;
 - (c) maidir le hinnill cuardaigh ar líne, airíonna de dhearadh an tsuímh gréasáin a úsáideann úsáideoirí suíomhanna gréasáin corparáideacha.
4. [...]

Airteagal 6

Cóir dhifreáilte

1. Áireoidh soláthraithe seirbhísí idirmheánaithe ar líne ina dtéarmaí agus coinníollacha tuairisc ar aon chóir dhifreáilte a thugann siad, nó a d'fhéadfadh siad a thabhairt, i dtaca le hearraí nó seirbhísí a thairgtear do thomhaltóirí trí na seirbhísí idirmheánaithe ar líne sin ag an soláthraí féin nó ag aon úsáideoirí gnó a rialaíonn an soláthraí sin ar thaobh amháin, agus ar an taobh eile, úsáideoirí gnó eile.
2. Cumhdófar **go háirithe** [...] leis an tuairisc dá dtagraítear i mír 1, i gcás inarb infheidhme, aon chóir dhifreáilte a dhéanfaidh soláthraí na seirbhísí idirmheánaithe ar líne, a bhaineann le haon cheann díobh seo a leanas, trí bhearta sonracha nó trí iompar an tsoláthraí sin:

- (a) rochtain atá ag an soláthraí, nó ag na húsáideoirí gnó atá á rialú ag an soláthraí sin, ar shonraí pearsanta nó ar shonraí eile, nó iad araon, a chuireann úsáideoirí gnó nó tomhaltóirí ar fáil chun úsáid a bhaint as na seirbhísí idirmheánaithe ar líne lena mbaineann, nó a ghintear trí sholáthar na seirbhísí sin;
- (b) rangú;
- (c) aon luach saothair díreach nó indíreach a ghearrfar as úsáid na seirbhísí idirmheánaithe ar líne lena mbaineann;

rochtain ar sheirbhísí atá bainteach go díreach nó atá coimhdeach leis na seirbhísí idirmheánaithe ar líne lena mbaineann, [...] nó na coinníollacha a bhaineann le húsáid na seirbhísí sin [...] **nó aon luach saothair díreach nó indíreach a ghearrfar as a n-úsáid.**

Airteagal 7

Rochtain ar shonraí

1. Áireoidh soláthraithe seirbhísí idirmheánaithe ar líne, ina dtéarmaí agus coinníollacha, tuairisc ar an rochtain theicniúil agus chonarhach, nó easpa na rochtana sin, a bheidh ag úsáideoirí gnó ar aon sonraí pearsanta nó sonraí eile, nó iad araon, a chuireann úsáideoirí gnó nó tomhaltóirí ar fáil chun úsáid a bhaint as na seirbhísí idirmheánaithe ar líne lena mbaineann nó a ghintear trí sholáthar na seirbhísí sin.
2. Tríd an tuairisc dá dtagraítear i mír 1, cuirfidh soláthraithe seirbhísí idirmheánaithe ar líne an méid seo a leanas, [...] **go háirithe**, in iúl go leordhóthanach d'úsáideoirí gnó:
 - (a) cibé acu an bhfuil rochtain ag soláthraí na seirbhísí idirmheánaithe ar líne ar shonraí pearsanta nó ar shonraí eile, nó iad araon, a chuireann úsáideoirí gnó nó tomhaltóirí ar fáil chun úsáid a bhaint as na seirbhísí idirmheánaithe ar líne lena mbaineann nó a ghintear trí sholáthar na seirbhísí sin, agus, i gcás ina bhfuil, catagóirí na sonraí sin agus na coinníollacha faoina bhfuil rochtain aige orthu **agus a ndéantar na sonraí sin a sholáthar do thríú páirtithe**;

- (b) cibé acu an bhfuil rochtain ag úsáideoir gnó ar shonraí pearsanta nó ar shonraí eile, nó iad araon, a chuireann an t-úsáideoir gnó sin ar fáil i dtaca leis an úsáid a bhaineann sé as na seirbhísí idirmheánaithe ar líne lena mbaineann nó a ghintear trí sholáthar na seirbhísí sin don úsáideoir gnó sin agus do thomhaltóirí a earraí nó a sheirbhísí, agus, i gcás ina bhfuil, catagóirí na sonraí sin agus na coinníollacha faoina bhfuil rochtain aige orthu;
- (c) cibé acu an bhfuil, sa bhreis ar phointe (b), rochtain ag úsáideoir gnó ar shonraí pearsanta nó ar shonraí eile, nó iad araon, lena n-áirítear i bhfoirm chomhiomlánaithe, arna soláthar ag na húsáideoirí gnó agus tomhaltóirí uile nó arna ngineadh trí sholáthar na seirbhísí idirmheánaithe ar líne do na húsáideoirí gnó agus tomhaltóirí uile agus, i gcás ina bhfuil, catagóirí na sonraí sin agus na coinníollacha faoina bhfuil rochtain aige orthu.

Airteagal 8

Srianta maidir le coinníollacha éagsúla a thairiscint ar bhealaí eile

1. I gcásanna ina gcuireann soláthraithe seirbhísí idirmheánaithe ar líne, agus a gcuid seirbhísí á soláthar acu, srian ar chumas úsáideoirí gnó na hearraí nó seirbhísí céanna a thairiscint do thomhaltóirí ar choinníollacha éagsúla ar bhealaí seachas trí na seirbhísí idirmheánaithe ar líne sin, **i gcomhréir leis an dlí náisiúnta**, áireoidh siad forais an tsriain sin ina gcuid téarmaí agus coinníollacha agus cuirfidh siad ar fáil don phobal go héasca iad. Áireofar leis na forais sin príomhbhreithnithe eacnamaíocha, tráchtála nó dlí na srianta sin.
2. Ní dhéanfaidh an oibleagáid a leagtar amach i mír 1 difear d'aon toirmeasc ná teorainn i leith forchur na srianta sin a thagann chun cinn mar thoradh ar rialacha eile de chuid an Aontais a chur i bhfeidhm nó rialacha náisiúnta eile atá i gcomhréir le dlí an Aontais agus a bhfuil soláthraithe na seirbhísí idirmheánaithe ar líne faoina réir.

Airteagal 9

Córas inmheánach chun déileáil le gearáin

1. Déanfaidh soláthraithe seirbhísí idirmheánaithe ar líne foráil do chóras inmheánach chun déileáil le gearáin ó úsáideoirí gnó.

Beidh rochtain éasca ag úsáideoirí gnó ar an gcóras inmheánach sin chun déileáil le gearáin. Tabharfaidh sé deis dóibh a ngearáin a thaisceadh go díreach leis an soláthraí lena mbaineann i dtaca le haon cheann de na saincheistean seo a leanas:

- (a) neamhchomhlíonadh a líomhnaítear a bheith déanta ag an soláthraí sin maidir le haon oibleagáidí dlíthiúla a leagtar síos sa Rialachán seo agus a dhéanann difear [...] don ghearánaí;
 - (b) saincheistean teicneolaíocha a bhaineann go díreach le soláthar seirbhísí idirmheánaithe ar líne, agus a dhéanann difear don ghearánaí [...];
 - (c) bearta a dhéanann an soláthraí, nó iompar an tsoláthraí, a bhaineann go díreach le soláthar na seirbhísí idirmheánaithe ar líne agus a bhfuil tionchar acu ar an ngearánaí [...].
2. Mar chuid dá gcóras inmheánach chun déileáil le gearáin, déanfaidh soláthraithe seirbhísí idirmheánaithe ar líne an méid seo a leanas:
 - (a) breithniú go cuí ar na gearáin a bheidh taiscthe agus ar an measúnú iar-iniúchta a d'fhéadfadh a bheith le tabhairt don ghearánaí acu chun dul i ngleic go leordhóthanach leis an tsaincheist a ardaíodh, ar bhealach atá comhréireach le tábhacht agus castacht na saincheiste sin;
 - (b) gearáin a phróiseáil go pras agus go héifeachtach, agus tábhacht agus castacht na saincheiste a ardaíodh á gcur san áireamh;
 - (c) toradh an chórais inmheánaigh chun déileáil le gearáin a chur in iúl don ghearánaí go haonair, i [...] bhfoclaíocht **shoiléir shothuigthe**.

3. An fhaisnéis ábhartha uile a bhaineann le rochtain ar a gcóras inmheánach chun déileáil le gearáin, agus lena fheidhmiú, cuirfidh soláthraithe seirbhísí idirmheánaithe ar líne **ar fáil** í ina dtéarmaí agus ina gcoinníollacha.
4. Gach bliain déanfaidh soláthraithe seirbhísí idirmheánaithe ar líne feidhmiú agus éifeachtúlacht a gcóras inmheánach chun déileáil le gearáin a leagan amach agus faisnéis maidir leis sin a chur ar fáil ar bhealach ina mbeidh fáil go héasca ag an bpobal air.

Áireofar leis an bhfaisnéis sin líon iomlán na ngearán a thaiscfear, **príomhchineálacha** na [...] ngearán **agus an mheántréimhse ama** a bheidh ag teastáil chun na gearáin a phróiseáil [...].
5. Ní bheidh feidhm ag forálacha an Airteagail seo maidir le soláthraithe seirbhísí idirmheánaithe ar líne ar fiontair bheaga iad de réir bhrí Airteagal 2(2) den Iarscríbhinn a ghabhann le Moladh 2003/361/CE¹².

¹² Moladh 2003/361/CE ón gCoimisiún ón 6 Bealtaine 2003 maidir le micrifhiontair, fiontair bheaga agus fiontair mheánmhéide a shainmhíniú (IO L 124, 20.5.2003, lch. 36).

Airteagal 10

Sainmhínte

1. Déanfaidh soláthraithe seirbhísí idirmheánaithe ar líne [...] **beirt** idirghabhálaithe nó níos mó a shainaithint ina dtéarmaí agus coinníollacha lena bhfuil siad sásta déileáil chun iarracht a dhéanamh teacht ar chomhaontú le húsáideoirí gnó maidir le réiteach lasmuigh den chúirt ar aon díospóidí idir an soláthraí agus an úsáideoir gnó a eascróidh as soláthar na seirbhísí idirmheánaithe ar líne lena mbaineann, lena n-áirítear gearáin nach bhféadfaí a réiteach tríd an gcóras inmheánach chun déileáil le gearáin dá dtagraítear in Airteagal 9.

Ní fhéadfaidh soláthraithe seirbhísí idirmheánaithe ar líne idirghabhálaithe a chuireann a seirbhísí idirmheánaithe ar fáil as áit atá lasmuigh den Aontas a shainaithint ach amháin i gcás ina n-áirithítear nach ndéanfar na buntáistí a ghabhann le haon choimircí dlíthiúla a leagtar síos i ndlí an Aontais nó i ndlí na mBallstát a cheilt ar na húsáideoirí gnó mar thoradh ar na seirbhísí sin a bheith á gcur ar fáil ag na hidirghabhálaithe lasmuigh den Aontas.

1a. Beidh soláthraithe seirbhísí idirmheánaithe ar líne agus a n-úsáideoirí gnó saor le hidirghabhálaí dá rogha féin a shainaithint go comhpháirteach nach bhfuil sainaitheanta i dtéarmaí agus i gcoinníollacha an tsoláthraí seirbhísí idirmheánaithe ar líne lena mbaineann tar éis do dhíospóid teacht chun cinn eatarthu.

2. Comhlíonfaidh na hidirghabhálaithe dá dtagraítear i mír 1 na ceanglais seo a leanas:
 - (a) tá siad neamhchlaonta agus neamhspleách **ar sholáthraí na seirbhísí idirmheánaithe ar líne agus ar an úsáideoir gnó lena mbaineann;**
 - (b) tá a seirbhísí idirghabhála inacmhainne ag [...] úsáideoir gnó na seirbhísí idirmheánaithe ar líne lena mbaineann;

- (c) tá siad in ann a seirbhísí idirghabhála a sholáthar i dteanga na dtéarmaí agus na gcoinníollacha lena rialaítear an gaol conarthach idir soláthraí na seirbhísí idirmheánaithe ar líne agus an t-úsáideoir gnó lena mbaineann;
 - (d) is féidir rochtain fhisiciúil a fháil orthu go héasca san áit ina bhfuil siad bunaithe nó in áit chónaithe an úsáideora gnó, nó go cianda trí úsáid a bhaint as teicneolaíochtaí cumarsáide;
 - (e) tá siad in ann a seirbhísí idirghabhála a sholáthar gan aon mhoill mhíchuí;
 - (f) tá tuiscint leordhóthanach acu ar ghaolta tráchtála ginearálta gnólacht le gnólacht, rud a thugann deis dóibh cuidiú go héifeachtach leis an iarracht díospóidí a réiteach.
3. Glacfaidh soláthraithe seirbhísí idirmheánaithe ar líne **agus úsáideoirí gnó** páirt, de mheon macánta, [...] **má dhéanann siad** iarracht teacht ar chomhaontú trí idirghabháil aon duine de na hidirghabhálaithe a bheidh sainaitheanta acu i gcomhréir le mír 1, d'fhonn teacht ar chomhaontú maidir le réiteach na díospóide.
4. Seasfaidh soláthraithe seirbhísí idirmheánaithe ar líne cion réasúnach de chostais uile na hidirghabhála i ngach cás aonair. Cinnfear cion réasúnach de na costais iomlána sin, ar bhonn moladh ón idirghabhálaí, trí ghnéithe ábhartha uile an cháis atá idir lámha a chur san áireamh, go háirithe an fiúntas coibhéiseach atá le héilimh na bpáirtithe sa díospóid, iompar na bpáirtithe, chomh maith le méid agus neart airgeadais na bpáirtithe i gcoibhneas lena chéile. [...]
5. Aon iarracht chun teacht ar chomhaontú trí bhíthin idirghabhála maidir le réiteach díospóide i gcomhréir leis an Airteagal seo, ní dhéanfaidh sí difear do chearta soláthraithe na seirbhísí idirmheánaithe ar líne agus na n-úsáideoirí gnó lena mbaineann i dtaca le himeachtaí breithiúnacha a thionscnamh aon tráth le linn an phróisis idirghabhála nó ina dhiaidh.

5a. Ní bheidh feidhm ag an oibleagáid a leagtar amach i Mír 1 maidir le soláthraithe seirbhísí idirmheánaithe ar líne ar fiontair bheaga iad de réir bhrí Airteagal 2(2) den Iarscríbhinn a ghabhann le Moladh 2003/361/CE.

Airteagal 11

Idirghabhálaithe speisialaithe

Spreagfaidh an Coimisiún soláthraithe seirbhísí idirmheánaithe ar líne chomh maith leis na heagraíochtaí agus na comhlachais a dhéanann ionadaíocht orthu chun eagraíocht amháin nó níos mó a bhunú go haonair nó go comhpháirteach d'fhonn seirbhísí idirghabhála a sholáthar lena gcomhlíonfar na riachtanais a shonraítear in Airteagal 10(2), leis an gcuspóir sonrach réiteach lasmuigh den chúirt a éascú ar dhíospóidí le húsáideoirí gnó a eascróidh i dtaca le soláthar na seirbhísí sin, agus cineál trasteorann na seirbhísí idirmheánaithe ar líne á chur san áireamh go háirithe.

Airteagal 12

Imeachtaí breithiúnacha eagraíochtaí ionadaíocha nó comhlachais ionadaíocha agus comhlachtaí poiblí

1. Beidh sé de cheart ag eagraíochtaí agus ag comhlachais a bhfuil leas dlisteanach acu in ionadaíocht a dhéanamh ar úsáideoirí gnó nó in ionadaíocht a dhéanamh ar úsáideoirí suíomhanna gréasáin corparáideacha, chomh maith le comhlachtaí poiblí arna mbunú sna Ballstáit, [...] caingean a thabhairt os comhair cúirteanna **inniúla** náisiúnta san Aontas, i gcomhréir le rialacha dhlí an Bhallstáit ina dtabharfar an chaingean, chun aon neamhchomhlíonadh ag soláthraithe seirbhísí idirmheánaithe ar líne nó ag soláthraithe innill cuardaigh ar líne maidir leis na ceanglais ábhartha a leagtar síos sa Rialachán seo a stopadh nó a chosc.

2. Ní bheidh an ceart dá dtagraítear i mír 1 ag eagraíochtaí nó comhlachais ach amháin i gcás ina bhfuil na ceanglais uile seo a leanas á gcomhlíonadh acu [...]:

- (a) tá siad comhdhéanta mar is ceart i gcomhréir le dlí Ballstáit;
- (b) saothraíonn siad cuspóirí atá ar mhaithe le leasanna coiteanna an ghrúpa soláthraithe gnó nó úsáideoirí suíomhanna gréasáin corparáideacha ar a ndéanann siad ionadaíocht **ar bhonn leanúnach**;
- (c) is de chineál neamhbhrabúsach iad [...];
- (d) áirithítear nach bhfuil tionchar míchuí ag aon soláthraithe maoinithe tríú páirtí ar a gcinnteoireacht, agus nach nglacann siad le maoiniú ó aon soláthraithe seirbhísí idirmheánaithe ar líne ná ó sholáthraithe inneall cuardaigh ar líne.**

Chun na críche sin, déanfaidh na heagraíochtaí nó na comhlachais faisnéis maidir le ballra, struchtúr rialachais, agus airgeadas a nochtadh go hiomlán agus go poiblí.

2a. Sna Ballstáit ina bhfuil na comhlachtaí poiblí [...] curtha ar bun, beidh an ceart dá dtagraítear i mír 1 ag na comhlachtaí poiblí sin, i gcás ina gceanglófar orthu leasanna coiteanna úsáideoirí gnó nó úsáideoirí suíomhanna gréasáin corparáideacha a chosaint nó comhlíonadh na gceanglas a leagtar síos sa Rialachán seo a áirithiú, i gcomhréir le dlí náisiúnta an Bhallstáit lena mbaineann.

2b. Féadfaidh na Ballstáit an méid a leanas a ainmniú:

- (a) **eagraíochtaí nó comhlachais arna mbunú ina mBallstát a chomhlíonann ar a laghad ceanglais mhír 2 arna iarraidh sin dóibh;**

(b) comhlachtaí poiblí arna mbunú ina mBallstát a chomhlíonann ceanglais mhír 2a, dá dtabharfar an ceart dá dtagraítear i mír 1; déanfaidh siad a n-ainm agus a gcuspóir a chur in iúl don Choimisiún.

2c. Cuirfidh an Coimisiún liosta de na heagraíochtaí, na comhlachais agus na comhlachtaí poiblí i dtoll a chéile de réir mhír 2b, mar aon le sonraíocht a gcuspóra. Foilseofar an liosta sin in *Iris Oifigiúil an Aontais Eorpaigh*; foilséofar athruithe ar an liosta sin gan mhoill agus foilséofar an liosta nuashonraithe gach sé mhí.

2d. Glacfaidh na cúirteanna leis an liosta sin mar chruthúnas ar inniúlacht dhlíthiúil na heagraíochta, an chomhlachais nó an chomhlachta poiblí, gan dochar dá gceart scrúdú a dhéanamh ar cé acu a thugann nó nach dtugann cuspóir an éilitheora údar le gníomhaíocht a dhéanamh i gcás faoi leith.

2e. Má chuireann Ballstát nó an Coimisiún ábhar inní in iúl maidir le comhlíonadh na gcritéar a leagtar síos i mír 2 ag eagraíocht nó comhlachas, nó, maidir le comhlíonadh na gcritéar a leagtar amach i mír 2a ag comhlachtaí poiblí, déanfaidh an Ballstát a d'ainmnigh an eagraíocht, an comhlachas nó an comhlacht poiblí sin imscrúdú ar an ábhar inní agus, i gcás inarb iomchuí, déanfaidh an Ballstát an t-ainmniú a chúlghairm i gcás nach gcomhlíontar critéar amháin nó níos mó.

3. Beidh an ceart dá dtagraítear i mír 1 gan dochar do chearta úsáideoirí gnó agus úsáideoirí suíomhanna gréasáin corparáideacha [...] aon chaingean a thabhairt os comhair cúirteanna inniúla náisiúnta, i gcomhréir le rialacha dhlí an Bhallstáit ina dtugtar an chaingean sin, atá bunaithe ar chearta aonair agus a bhfuil sé d'aidhm aige [...] aon neamhchomhlíonadh ag soláthraithe seirbhísí idirmheánaithe ar líne nó ag soláthraithe inneall cuardaigh ar líne a stopadh maidir leis na ceanglais ábhartha a leagtar síos sa Rialachán seo.

Airteagal 12a

Forfheidhmiú

Leagfaidh na Ballstáit síos na rialacha ina leagtar amach na bearta is infheidhme maidir le sáruithe ar fhorálacha an Rialacháin seo agus áiritheoidh siad go gcuirfear chun feidhme iad. Beidh na pionóis dá bhforáiltear éifeachtach, comhréireach agus athchomhairleach.

Airteagal 13

Cóid Iompair

1. Spreagfaidh an Coimisiún soláthraithe seirbhísí idirmheánaithe ar líne, agus eagraíochtaí agus comhlachais a dhéanann ionadaíocht orthu, chun cóid iompair a dhréachtú **a mbeidh sé i gceist go gcuideoidís** le cur i bhfeidhm cuí an Rialacháin seo, agus sainairíonna na n-earnálacha éagsúla ina soláthraítear seirbhísí idirmheánaithe ar líne á gcur san áireamh mar aon le sainairíonna na micreafhiontar, na bhfiontar beag agus na bhfiontar meánmhéide.
2. Spreagfaidh an Coimisiún soláthraithe innill cuardaigh ar líne, agus na heagraíochtaí agus na comhlachais a dhéanann ionadaíocht orthu, chun cóid iompair a dhréachtú atá beartaithe **go sonrach** le cuidiú le cur i bhfeidhm cuí Airteagal 5 [...].

Airteagal 14

Athbhreithniú

1. Faoi [dáta: trí bliana tar éis an dáta theacht i bhfeidhm], agus gach trí bliana ina dhiaidh sin, déanfaidh an Coimisiún meastóireacht ar an Rialachán seo agus cuirfidh sé tuarascáil faoi bhráid Pharlaimint na hEorpa, faoi bhráid na Comhairle agus faoi bhráid Choiste Eacnamaíoch agus Sóisialta na hEorpa.
2. Déanfar an chéad mheastachán ar an Rialachán seo, ach go háirithe, d'fhonn measúnú a dhéanamh an gcomhlíontar na hoibleagáidí a leagtar síos in Airteagail 5, 6, 7 agus 8, chomh maith le tionchar na n-oibleagáidí sin ar gheilleagar na n-ardán ar líne, agus cibé acu an bhfuil rialacha breise, lena n-áirítear maidir le forfheidhmiú, de dhíth chun timpeallacht ghnó ar líne iontaofa inbhuanaithe intuartha chóir a áirithiú laistigh den mhargadh inmheánach.
3. Soláthróidh na Ballstáit aon fhaisnéis ábhartha **atá acu** a éileoidh an Coimisiún chun an tuarascáil dá dtagraítear i mír 1 a tharraingt suas.
4. Agus an meastachán ar an Rialachán seo á dhéanamh ag an gCoimisiún, cuirfidh sé san áireamh **inter alia** na tuairimí agus na tuarascálacha a bheidh curtha faoina bhráid ag grúpa saineolaithe don Fhaireachlann maidir le Geilleagar na nArdán ar Líne arna bhunú i gcomhréir le Cinneadh C(2018)2393 ón gCoimisiún. **Áiritheoidh an Coimisiún go ndéanfar tuairimí na mBallstát agus na ngeallsealbhóirí ábhartha a chur san áireamh go hiomchuí agus an tuarascáil mheastóireachta á hullmhú aige.** Cuirfidh sé comhthéacs agus feidhmiú aon chóid iompair dá dtagraítear in Airteagal 13 san áireamh freisin, i gcás inarb iomchuí.

Airteagal 15

Teacht i bhfeidhm agus cur i bhfeidhm

1. Tiocfaidh an Rialachán seo i bhfeidhm an fichiú lá tar éis lá a fhoilsithe in *Iris Oifigiúil an Aontais Eorpaigh*.
2. Beidh feidhm aige ón [dáta: [...]] **dhá mhí dhéag** tar éis lá a fhoilsithe].

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh sa Bhruiséil,

Thar ceann Pharlaimint na hEorpa

An tUachtarán

Thar ceann na Comhairle

An tUachtarán
